

# Ze barri?

ESKORIATZA / Egubakoitza / 2005eko maiatzaren 6a / 207. zenbakia

KOORDINATZAILEA: Iker Barandiaran • Oñalora 31 ARRASATE 20500 • Tel.: 943 71 25 11 • Faxa: 943 71 23 89 • Posta elektronikoa: zebarrri@goiena.com • Lege gordailua: SS200/99

## Erretiratuendako hiru ortu libre daude Torrebasen

IKER BARANDIARAN

Udalak aditzera eman du erretiratuendako hiru ortu libre daudela oraindik. Torrebasoko mendixkan daude ortuak, Almenen alboan. Martxoaren bukaeran urtebete egin zuten, eta oso harrera ona izan dute. Udalak hobekuntzak egingo ditu datozen egunetan.

2004ko martxoan jarri zituzten abian Torrebasoko muinoko ortuak. Udalarena da lurzorua eta aspalditik aurreikusitako ekimena egitea lortu zuten. Ezagun da herriko erretiratuek -beste herri askotakoek moduan- ortuan ibiltzea oso gustuko dutela. Erretiratuak zaletasun horretaz goza zezaten erraztasunak emateko eta udalerriko ortuak zelanbait ordenean jartzeko, lurzoru hori partzelatan banatu zuten. Hogeita egin zituzten.

Ortuen alboan, haiek ustiatzen dituztenek erabil dezaketen txabola eraiki zuten. Eta txabolaren barruan, aldatzeko eta gauzak gordetzeko armairu bana dute. Horrez gain, guztiak erabiltzeko moduko ur putzua dute, eta ortuen artean bideak eginda daude. Udaleko zinegotzi Juan Luis Merinok azaldutakoaren arabera, joan den urtean ur faltan ibili ziren, baina aurten ur-hartunea egin dute, hori saihesteko.

### HOBKUNTZAK EGIN BEHAR DITUZTE

Juan Luis Merinok azaldutakoaren arabera, Udalak laster hobekuntzak egingo ditu. "Dagoeneko



JUAN LUIS MERINO

Orain dela urtebete ortuak hartu zituzten lagun guztiak akordioa berritu dute.

onartuta dago lehenengo partzela dagoen lekuan bi mahai handi jartzea, eta horietako bat markesina batekin estaltzea. Horrela, erretiratuek atsedean hartzeko lekua izango dute, eta eguzkitan edo itzalean egon ahal izango

dira. Gure asmoa da hemendik bi astera mahaiak eta markesina jarrita egotea".

### ORTUAREN ERABILERA, DOAN

Orain dela gutxi ortu horiek erabiltzen dituzten erretiratuek beste urtebeterako berritu zuten Udalarekin duten hitzarmena.

Udalak aditzera eman du oraindik hiru ortu libre daudela. "Interesatuak Udalera jotzea besterik ez dute. Eskatu ahala adjudikatuko ditugu". Merinok azpimarratu zuen erabiltzaileek ez dutela ezer ordaindu behar. "Norberak haziak, aitzurra eta ureztontzia ekarri beharko ditu".

*Erretiratuek ez dute ezer ordaindu behar. Udalak partzelak, urputzuak eta aldatzeko armairuak ipini ditu*

## Hezkuntza bermatzeko ekimen sinbolikoa, eskolan

I.B.

Alboan gobernu kanpoko erakundeak *Hezkuntza guztiontzat* kanpaina abiarazi du Euskal Herriko 40 bat eskolatan. Horien artean, Eskoriatzako Luis Ezeizan.

Joan den egubakoitzean egin zuten ekimena. *Hezkuntza guztiontzat* kanpainaren bitartez bermatu gura dute munduko ume guztiak hezkuntza jasotzea. Munduko agintariak horren aldeko agiri bat sinatu zuten, baina ez dute horren aldeko pausorik eman. Horregatik, Alboanek eta gobernu kanpoko beste erakunde batzuek umeak eta politi-

kariak kontzientziazteko kanpaina abiarazi dute.

Eskoriatzako Luis Ezeiza eskolara PP alderdiko Juana Bengoetxea politikaria gonbidatu zuten. Ordurako, Lehen Hezkuntzakoek eskolan Hirugarren Munduaren egoera aztertu zuten.

Hortaz, ikasleek garatu barietate herrialdeetan neska-mutilek eskolara joateko dituzten zailtasunak zenbatu eta Bengoetxeari aditzera eman zizkioten. Luis Ezeizako umeek munduaren marrazki bat egin zuten. Gaiak, herri garatuak irudikatuz, hori kolorez margotu zuten; eta gainontzekoa, morez. Politikariak desberdintasun hori ezabatzeko eskatu zieten.



AMAGUIA LASAGABATER

Ekimen honen bitartez, umeak eta politikariak kontzientziaztea gura dute.

**AZKOAGA**  
ESTANKOA

943 71 48 77  
Zure  
Zerbitzura



MIRENTXU  
**TABERNA**  
Kafe goxoa hartzeko  
Tel.: 943 71 41 67

**Villar**  
Ile apaindegia

Olazar auzoa 9  
Tel.: 943 71 50 42  
ESKORIATZA



Gustora egoteko!

Intxaurtueta 8  
ESKORIATZA  
943 71 40 63

**TELEFONO JAKINGARRIAK**

ESKORIATZA	
Udaletxea	943 71 44 07
Udal bulegoak	943 71 45 32
Udaltzaingoa	943 71 44 07
Euskaltegia	943 79 21 68
Kultura etxea	943 71 46 88
Gizarte laguntzailea	943 71 31 36
Kirol etxea	943 71 53 28
Liburutegia	943 71 31 35
Luis Eceiza	943 71 53 56
Jose Arana Almen Ikastola	943 71 44 86
Almen	943 71 49 07
Museo Eskola	943 71 54 53
Axtroki	943 71 40 77
HUHEZI	943 71 41 57
Osakidetza	943 71 44 52
Telesko	943 71 49 17
Taxiak	943 71 40 59

BESTELAKOAK	
Eskualde ospitalea (Arrasate)	943 00 53 00
Gurutze Gorria (Bergara)	943 76 55 76
Erzaintza (Arrasate)	943 79 71 99
Suhiltzaileak (Oñati)	943 79 28 00
Renfe (Zumarraga)	943 72 15 15
Renfe (Gasteiz)	945 23 20 30
PESA (Arrasate)	902 10 12 10
Larrialdiak (Arrasate)	943 77 10 43
SOS Deiak	112

**OHARRAK**

**ALDAYE ELKARTEKO BATZAR OROKORRA**

Bihar, zapatua, Aldaye elkarte gastronomikoak batzar orokorra egingo du kultura-etxean, 16:30ean. Bazkide guztiei deialdia egin gura diete.

**BIHAR, ZAPATUA, SASKIBALOI NORGEHIAGOKAK**

Bihar, zapatua, saskibaloitalde hiru norgehiagoka izango dira kiroldegian: 16:00etan, junior taldeak Salletarren kontra jokatuko du; ordu berean, kadeteak B.K.L. CAFen kontra lehiatuko dira; eta 18:00etan, senior taldea La Salleren kontra lehiatuko da.

**PATINAJE IKASTAROA ANTOLATU DUTE**

Aurten ere patinaje ikastaroa egingo dute pilotalekuan. Bihar, zapatua, izango da izena emateko azkeneko eguna. Maiatzaren 15ean, 22an eta 29an, eta ekainaren 5ean eta 12an egingo dute. Hastapen mailakoak, 10:30etik 12:00etara; eta sakontze mailakoak, 12:00etatik 13:30era. Kiroldegiko bazkideek 10 euro ordaindu beharko dituzte. Bazkide ez direnek, berriz, 13 euro.

**AXTROKIREN AGENDA**

**'ASTELEHENEN GOIENKARIA'-KO HARPIDETZAN BEHERAPENA**

Axtrokiko bazkideek 5,50 euroko beherapena izango dute *Asteleheneko Goiencaria*-ko harpidetzan. Deitu honako telefono zenbakira: 943 76 92 70.

**SAN PEDRO JAIETARAKO PRESTAKUNTZAK**

**San Pedro jaiak iragartzeko horma-irudi lehiaketa deitu dute**

IKER BARANDIARAN

Dagoeneko Udaleko Kultura Saila eta herriko hainbat elkarte badabilta San Pedro jaiak antolatzen. Otsailean hasi ziren, eta hilabeteko bigarren eguazteneko elkartzen dira kultura-etxean. Hitzordua 18:00etan egiten dute, eta aditzera eman dute batzar irekiak direla. Hortaz, interesa duenak hara jo dezake. Hurrengo batzarra maiatzaren 11n egingo dute.

Bestalde, Udaleko Kultura Sailak abian jarri du San Pedro jaiak iragartzeko horma-irudi lehiaketa. Edozein lagunek esku hartu ahal izango du, inolako muga barik. Horma-irudiak 21 x 10 zentimetro izan beharko ditu. Hortaz, aurkeztutako lanak neurri horiek izan beharko ditu.

Teknika libre izango da, eta lanek derrigorrez honako testua izan beharko dute: *2005eko San Pedro Jaiak. Eskoriatza. Ekainak 28, 29 eta 30, Uztailak 1.*

Irabazleak 300 euroko saria jasoko du, eta Udalak egoki ikusten badu, aurkeztutako lan guztiek irakusketa egingo du.



San Pedro jaietan adin guztietakoendako ekintzak izango dira.

Lanak udaletxera edo kultura-etxera eraman beharko dituzte 2005eko maiatzaren 20ko 14:00ak baino lehen. Epaimahaiaren erabakia aldaezina izan-

go da, eta lehenbailehen emango dute aditzera.

Saritzen duten lana Udalaren esku geldituko da, eta hark izango du kaleratzeko eskubidea.

**Eguraldiak lagunduta, egun-pasa ederra egin zuten Aitzorrotzen**

IKER BARANDIARAN

Zubia dela-eta, hainbat lagunek kanpora jo zuten asteburuan. Arrazoi horregatik, joan den urtean baino lagun gutxiago izan ziren aurtengoan. Hala ere, ehunka eskoriatzarrek egin zioten kasu urteroko hitzorduari eta Aitzorrotzera igo ziren. Are gehiago, eguraldia lagun izan zuten, eta egunaz gozatzeko aukera, beraz.

Arrasateko parroko Genaro Lekuonak eman zuen meza 11:30ean, eta Xapre eta Zaharra trikitilariak alaitu zuten eguna. Herri-bazkaririk egin ez zuten arren, hainbat lagunek Aitzorrotzen bertan egin zuten jatordua, etxetik janaria eramanda edo tabernan eskuratuta. Egun zoragarriaz gozatu ostean, arratsaldean Herriko Plazara jaitsi ziren gehientsuenak, eta han jaiak iluntzera arte jarraitu zuten.

**OHIKOA BAINO JAI LUZEAGOA**

Ohikoa den moduan, herritarrek etxean egindako tortillak salgai jarri zituzten, eta ez zen inor gose gelditu. Horrez gain, Kaixo taldeak alaituta dantzaldia egin zuten plazan. Berandura arte gelditu zirenek kontatu digute, biha-



Trikitilarien musikarekin hasi eta iluntzeko dantzaldiarekin bukatu zen eguna.

ramuna jai izanda eta eguraldiak lagunduta, Aitzorrotz eguna edo gaua dezente luzatu zela.

**OHIKOA BAINO JAI LUZEAGOA**

Urtero, egun horretan, guraso taldeak eta Atxorrotz gobernuz

kanpoko erakundeak egiten dute lan. Horregatik, tortillekin batutako dirua herriko elbarrituei laguntzeko, eta Atxorrotz elkar-teak Montevideon eta Boli Kostan dituen proiektuetarako bideratuko dute.

**LABUR**

**Anai-arreben arteko inbidien gaineko berbaldiak**

Eskoriatzako guraso eskolak, sarritan egin ohi duen moduan, hainbat berbaldi-tailer antolatu ditu datozen egu-netarako. Eguaztenean, hilaren 11n, eta eguenean, hilaren 12an, *Anai-arreben arteko harremanak: inbidiak, zeloak...* leloa duten jardunaldiak egingo dituzte kultura-etxean. Bi egunetan 18:00etan hasiko dituzte berbaldiak.

Urtxintxako Aitziber Goitia psikologoak gidatuko ditu tailer horiek eta, batez ere, gurasoei zuzenduta daude. Hala ere, aditzera eman digute beste edozein herritarrek ere jo dezakeela hara. Ordu eta erdi inguruko iraupena izango dute, eta Aitziber Goitia entzuleen parte-hartzea bermatzen saiatuko da, tailerra dinamikoagoa izan dadin.

Honako gaiak landuko dituzte: jelskortasuna eta inbidiak; gurasoen eta umeen jarrerak eta portaerak; eta zeloak sor ditzaketen egoerak, besteak beste. Horrez gain, material didaktikoa eta gaiaren gaineko bibliografia banatuko dute.

**KZgunean hainbat ikastaro egingo dituzte maiatzean**

Ohikoa den moduan, Eskoriatzako KZgunean hainbat ikastaro antolatu dituzte maiatzerako. Aditzera eman digutenez, hilabete honetako ikastaro guzti horiek euskaraz egingo dituzte.

Maiatzerako iragarri dituzten gain, joan den egubakoitzean, apirilaren 29an, *Zure etxebizitza aurkitu* izeneko ikastaroa egin zuten.

Gaur, egubakoitza, *Ardoa ezagutu* leloa duen ikastaroa egin dute. 09:00etatik 11:00etara izan da hori.

Datozen egubakoitzetarako honako ikastaro hauek iragarri dituzte: maiatzaren 13an, Flashgeta erabiltzen ikasiko dute, 09:00etatik 11:00etara; maiatzaren 20an, Outlook express-aren gaineko azalpenak jasoko dituzte, 11:00etatik 13:00etara; eta hilaren 27an, bakoitzak bere aseguru kontratatzen irakatsiko diete, 09:00etatik 11:00etara. Oraindik badago aukera ikastaro horietan izena emateko. Interesatuek jo dezatela KZgunea lehenbailehen.

Horrez gain, KZgunea hasi da ekainerako beste ikastaro batzuk antolatzen. Are gehiago, erabiltzaileen proposamenen zain daude. Hortaz, hor daukazue gomendioak emateko aukera.